



အပိုင်း ကျေးဇူးတင်ကြား



- ကဲန်းဘဲ, - အပိုမ် ကျေားစံပ်ဖြား ၃
- ကဲအီးကပ္ပကျေား; - တော်င်းစိင်၊ မာည်းလူကျာ၊ ဆာင်အော်င်
- တည်းကျေား; - တအာင်းရူမာည်း
- ကဲအီးစဲတ်မဲန်း - ဆဲင်မည်၊ တော်င်းစိင်၊ မာည်းလူကျာ၊ ဆာင်အော်င်
- ဘော်က်စဲတ်မဲန်း - ဘော်က် အ
- ဆည်းလည်လေး; - ပကျိုဝ်းဖိုန်၊ ဆာင်နမ် ၂၀၁၈

Title : Bible Stories - 3
 Translated by : Taung Sein, Mai Lu Jar, San Aung
 Language : Ta'ang Rumai
 Edited by : Seng Mai, Taung Sein, Mai Lu Jar, San Aung
 Edition : 1st Edition
 Date : April 2018

Translated from the English *Open Bible Stories*. Original work available at unfoldingWord.org/stories



This work is licensed under the Creative Commons Attribution-NonCommercial-ShareAlike 4.0 International License. To view a copy of this license, visit <http://creativecommons.org/licenses/by-nc-sa/4.0/> or send a letter to Creative Commons, PO Box 1866, Mountain View, CA 94042, USA.

ယေးမှာန်းဒဲးဆူး အီးမိုးပံပ်အီးတော,အရောင် အီးဗိုဝ်းနဲ့လောင်ကြားစံဝ်
နောင်းပေန်မာင်ကလာ စာဓါးဗည်းအဲကဲ အီးဂေါ်ညး တဲင်းကံမ်ဖာတော်န်း
ဖြားနီး
ဒီးဟံ့။

ခပ်ကဏ္ဍ ကော်းဘေ့,

၁၁။ စံဝ်ဖြားဒဲးကတိ ဒါးနံင်တိုန်းလေးဒဲးမေဆိယ	၁
၂၂။ ဘည်ဘာည်းကိုတ်းဒဲး ယောဟာန်	၁၁
၂၃။ ဘည်ဘာည်းကိုတ်းဒဲး စံဝ်ယေဆု	၁၇
၂၄။ ယောဟာန်ဒဲးဘပ်တိစမ် တံ့စံဝ်ယေဆု	၂၃
၂၅။ ခုန်ဆိုင် ကံဝ်းယော် ခလံဝ်း စံဝ်ယေဆု	၂၉
၂၆။ စံဝ်ယေဆု တယ်ရဲန်း ဇိုင်းစံဝ်	၃၅
၂၇။ အပိုမ်ကျားကကည်းဆမာရီအန်းအီးပေန်ပဲန်း	၄၁
၂၈။ တူအီးချဲမ်း မှော့,စာနံင်လဲပ်ကိုင်းစံဝ်ဖြား	၄၉
၂၉။ ဘည်ဘာည်းနံင်ပျိုတ်ဒဲး ပံင်ကလူည်,အီး	၅၅
၃၀။ စံဝ်ယေဆု ချိုင်းဒဲး တူအီးဖ်န်းဟောင်း	၆၁


၂၁။ စံင်ဖြားဒဲးကတိ ဒါးနံင်တိုန်းလေးဒဲးမေဆိယ



တရုး ၃း၁၅၊ ၁၂း၁-၃၊ ဟောကြား ၁၈း၁၅၊ ၂ ဆမိုည်လ ၇၊




စံဝ်ဖြားဟည်ဒဲးအူန်းကတိဒါ်; မေဆိယနံင်လေးဒဲး၊ အီးဒီးမိုးပေါ၊ ဆိုင်ခည်
 ဇိုအာဒိမ်ကာည်းအေးဓဟံ့။ စံဝ်ဖြားမဲးကတိဒါ်; တိုင်ခြိုဝ်းမျိုးအေးဓဒီးအူ
 ချေး၊ အန်းနံင်ညေ့၊တဒီးဗိုန်ပေါ၊ ကော်န်းခူန်ဆိုင်။ ခူန်ဆိုင်ဒီး အန်းစီရဲန်းပေန်
 အရာင် ဘာည်းတိုးဟန်း စီယော်ခလံဝ်းအေးဓ။ ပံင်ဆိုင်ဒါ်;အန်း အီးမိုးကျေား
 ကတိဒီး မိုးမေဆိယနံင်ဘယ်ကမ်းကယာင်ဗိုန် ခူန်ဆိုင်ဒီးဟံ့။



စံဝ်ဖြားစီဒဲးအူန်းဘိုးကျေားကတိ တံ့အာဘရာဟံမ် ဒါ်; ဂေါ၊မိုးလိုင်းအန်း
 ခြိုဝ်းမျိုးတူအီးကဲပါပည်မဲးမံ ကဲနံင်ဘိုန်းလာည်းဒို့ ကောင်းမင်ကလာ။
 ကောင်းမင်ကလာဒီး စီမိုးမေဆိယ အီးနံင်ချော်တ်လာည်း တူအီးပါပည်မဲး
 နံင်လေးဒဲးဒီးဟံ့။




စံပ်ဖြားစီဒဲးအူန်းဘိုးကျော့ကတိ တံ့မောဆေ ဒါးအန်းစံပ် နံင်ဆူည်,လေး
ဒဲးဘိုး ပရောဖဲတ်အန်းအီးဘာည်းအန်း ဘိုးအူချေး။ အီးဒီးမာ် မိုးပေါ, လောင်
မေဆိယနံင်လေးဒဲးဒီးဟာ်။




စံပ်ဖြားစီဒဲးဘိုးကျော့ကတိ တံ့ဒါဇေန် ဒါးမေဆိယဒီး နံင်မိုး တိုင်ခဲင်
ခြိုဝ်းမျိုးကော်န်းလှာန်အန်းကဲဟာ်။



စံဝ်ဖြားစီဒါးပရောဖဲတ်ယေရမိ စီဒဲးကတိကလောင်းဒါး အန်းနံင်ရဲန်းကတိ ဆေတ်စာတမည်း။ အီးမိုးကတိဆတ်စာတမည်းဒီး နံင်ကိက်အုန်းပေါ၊ ခဲင်း နှော့တူအီးကဲ၊ ဘိုန်ဖဲန်း ကဲမာ် နံင်နာ်ဒဲးဒို့ စံဝ်ဖြား၊ ကဲမာ် နံင်မိုးဒို့ပေါ၊တူအီး စံဝ်ဖြား။ အီးမိုးစံဝ်ဖြားမာ် နံင်ပျိုတ်ဒဲးဒို့ ပံင်ကလူည်ကလဲပ်ကဲ။ မေဆိယဒီး အန်းနံင်တယ်စရဲန်းဟောင်း ကတိဆတ်စာတမည်းဒီးဟန့်။



မေဆိယအီးနံင်လေးဒဲးဒီး ပရောဖဲတ်မာ် အန်းမိုး ၊ တားစောင်းမာ် အန်းမိုး၊ တားကလျားဒါင်းမာ် အန်းမိုး။ ပရောဖဲတ်ဒါးအီး မိုးချေးအီးတညောင်း လာည်းကျော့စံဝ်ဖြား၊ အန်းစီမီးကလောင်းနဲဒဲးဒို့ တံ့တူအီးကဲ ကျော့ပံင်တညောင်း လာည်း အုန်းအန်းကဲဒီး။ မေဆိယ အန်းအီးနံင်လေးဒဲးဒီး မိုးပေါ၊ပရောဖဲတ် အန်းအီး ချမ်းမှယ်ဒို့ ခူအီးဟန့်။



တားစောင်းဒါးအီး မိုးချေးအီးပယာမ်းတိုဆံတ် စီလူဒဲးတံ့စံပ်ဖြား
 တာင်စာတူအီး နှာင်းကဲဘိုန်းလော်တ်ဒအိုင်ဂွဲတ်ကဲ။ တားစောင်းဒီး အန်းမိုးဘိုး
 အီးမှာန်းဆူးတံ့စံပ်ဖြား တာင်စာတူအီးကဲ။ မေဆိယအန်းအီးနံင်လေးဒဲးဒီး
 အန်းမိုး တားအောဒါင်းတားစောင်းအီးချမ်းမှယ်ဒိုခူအီး၊ မိုးပေါ၊ချေးအီးနံင်လူဒဲး
 တိုးပိုင်အန်း တံ့စံပ်ဖြားဟံ့။



တားကညားဒါင်းဒါးအီး မိုးချေးအီးတိုင်းမေန်းကိုင်းလှိုင်းအန်း၊ မိုးချေးအီး
 စေတ်မေန်းတြား တံ့တူအီးကဲ။ မေဆိယအန်းအီးနံင်လေးဒဲးဒီး နံင်မိုးပေါ၊
 တားကညားဒါင်းအီးချမ်းမှယ်ဒိုခူအီး စီနံင်အံက် တိုင်ပလောင်ကူန်းတားအန်း
 တားကညားဒါင်းဒါဇေက်။ အန်းမိုးဘိုး ချေးနံင်တိုင်းမေန်းဆေဟောင်း ကံမ်ဖာနီး၊
 မိုးချေးအီးနံင်စေတ်မေန်းတြားဆိုင်ဆိုင်မှာန်မှာန်၊ မိုးဘိုးချေး အီးနံင်လွံက်ကဘျိုဝ်း
 ဆိုင်ဆိုင်မှာန်မှာန်ဟံ့။



ဆိုင်ခည်အည်,နီး ပရောဖဲတ်ကဲဟည်ဟောကလောင်းပွေးအူန်း ဘည်ဘည်း နံင်ကိုတ်းလေးဒေး မေဆိယဒီး။ ပရောဖဲတ်မာလခိ ဟည်ဟောကလောင်းဒါးအူန်းလတ် ပရောဖဲတ်အီးမျာတ်ဒါင်း နံင်လေးဒေး အည်,ဒေး မေဆိယ။ ပရောဖဲတ်ဟောဆာယ မ် ဟည်ဟောကလောင်းဒါးလတ် မေဆိယဒီး နံင်ကိုတ်းလေးဒေး တံင်အီးလိုည်းစဲတ်။ ပရောဖဲတ်မေက်ခါမ် ဟည်ဟောကလောင်းဒါးအူန်းလတ် မေဆိယဒီး နံင်ကိုတ်း ပါ့လှိုင်းဘတ်လီန်ဟာံ။



ပရောဖဲတ်ကဲပါမဲးမ် ဟည်ကလောင်းန့ဒို အီးမိုးလော်င်ဘည်ဘည်းမေဆိယ နံင်ရဲန်းဇိုင်းစံဝ်ဒီး။ ပရောဖဲတ်ဟောဆာယစီကလောင်းဒါးအူန်းလတ် မေဆိယဒီး နံင် ဂေါ်ည်း ပါ့အရာပ်ဂါလိလဲ။ စားကဲအီးနော့ဒဲ ဘွာ်မ်းဘျာည်, အန်းနံင်ဒဲးဘွာ်မ်း ။ စားကဲအီးကတူးကညား အီးဘက်ချံင်အူန်း ကာည်း ကဲအီးကညားဇေးဂေါ်ည်း ခဲင်းကဘဲမ်းကဲမ် အန်းနံင်ဒဲးကဲဘိုန်းလော်တ်လေးဒို။ ဒဇဲန်းအာဝ်ဇါ်န်း အန်း ဟည်ဟောကလောင်းဒါးအူန်းဘိုလတ် အီးမိုးစားကဲအီး ငါည်းအ်, ဘူယဲဝ်းတိုဝ်း၊ စားကဲအီးချိုက်ကအာဝ်း၊ စားကဲအီးဘူဆမားကျော့; စီပါးစံမ့်ဘို တူအီးအန်းအီး ဘူဘယ်ဟာဝ်းကဲ အန်းနံင်ဒဲးဒိုကဲဂဲန်းချို,ဟာဝ်းပါပည်မဲးဟာံ။




ပရောဖဲတ်ဟေဆာယ ဟည်ဟောကလောင်းဒါးအူန်းလား မေဆိယဒီး အန်း ဘည်အာဝ်မဲး ပံင်ကလူည်,ကလဲပ်မာ် အန်းနံင်ကတူးအီးစံင်း၊ နံင်ကတူးအီးပယ် ဝီန်အန်း။ အီးမိုးတံင်ခဲင်းဘဲ,ကျာမ်းဆာလာမ်မာ် ဟည်ဟောကလောင်းဒါးအူန်းဘိုး အီးမိုးတဆီးချေပ်မေဆိယဒီး တူအီးကဲနံင်ညျေားစေကောက် စီကဆောင်းလာည်း။ မေဆိယဒီး အန်းနံင်ကတူးဘံင်ဖိုင်းအန်းအူချေ; နံင်ယားလှဲဝ်ဝီန်ကတိ တံင်အန်း။ (ဘဲ,ကျာမ်းဆာလာမ်ဒီး မိုးအီးတော,ခဲင်းဘဲ,ကျာမ်း အန်းမိုးဘိုးဆကျင်း ပံင်ဒါးယုဒကဲတာ် ဇိုက်ဖိုက်ခိုည်းတော,စံင်ဖြား။) ပရောဖဲတ်ဆာခရိမာ် ဟည်ဟော ကလောင်းဒါးအူန်း ဘံင်ဖိုင်းမေဆိယဒီးအူချေ; နံင်ယားလှဲဝ်ဝီန်ကတိ တံင်မေဆိယ ဒီး၊ ချေဒီးစီနံင်ယံင်းဝီန်အန်း ရှိန်းတဲင်ကားအိုည်းကိုင်းမေတ်။




ပရောဖဲတ်ကဲမာ် ဟည်ဟောကလောင်းဒါးအူန်းဘိုး ဘည်ဘာည်းနံင်ယာ်မး မေဆိယဒီး။ ပရောဖဲတ်ဟေဆာယ ဟည်ဟောကလောင်းဒါးအူန်း ဆိုင်ခည်အာည်,နီး အီးမိုးမေဆိယဒီး နံင်ကတူးကညားအီးဘတ်ဟပ်အဲမ်းဘတ်၊ အီးနံင်ဆဲနဘိုးအန်း၊ နံင်ကတူးဘိုး အီးငါး ၊ ဓါည်းဒီး အန်းစီနံင်ကတူး အီးဒါးလှဲက်း တော်က်ကတံက် ဂေါ,မှိုက်ပယာ်မးဝီန် တိုင်ရံင်းဟာ်ည်း။



မေဆိယဒီး အာဝ်မဲးမပံင်ကလူည်,ဆိ အန်းမိုးပေါ,တူအီးပေန်ပဲန်းအူချေး။
 အန်းမိုးပေါ, ချေးအီးနံင်ခံမ်လာည်းတံမ် တာင်စာပံင်ကလူည်,တူအီးကဲ။
 တံမ်လှေဒီး မိုးအီးနံင်ရဲန်းဒဲး စံင်ဖြားကာည်းတူအီးနီး စီးလည်ကလံက်စီးလည်ချီ။



အာဝ်မိုးမ ပရောဖဲတ်ကဲ ဟောကလောင်းဒါးအူန်းလို့ည် မေဆိယဒီး နံင်ကတူး
 ယာ်မ်း၊ လော်င်ဘည်ဘာည်း စံင်ဖြားနံင်စီးရဲန်းဒဲးအန်းစီးယာ်ည်,အိမ်းဒဲး ဒယာ်မ်း
 မာ် ကဲဟည်ဟောကလောင်းဒါးအူန်းဘိုးဟာ်။ ဂေါ,မိုး အန်းယာ်မ်းဟောင်းဘာည်းဇဲန်း
 ကာည်း အန်းစီးယာ်ည်,အိမ်းဒဲးဒီး၊ စံင်ဖြား စီနံင်တဟော်ည်,ဟောင်းလာ် ဇိုင်းကာည်း
 လော်င်ချော်တ်လာည်းအန်း။ ဓါည်းဒီး အန်းစီနံင်တယ်စရဲန်းဘိုး ကတိဆေတ်စာ
 အီးတမာည်းဟာ်။




စံဝ်ဖြားစီကလောင်းဗိုဝ်းနဲ့ဒဲး လော်င်မေဆိယဒီး တံ့ပရောဖဲတ်ကဲ ဟည်ဂိုဏ်း ပေါ,ခည်း။ ဘည်ဘာည်းမာ် မေဆိယဒီး စီညျမ်လေးဒဲးမ။ ဓါည်းဘိုန်ဟောင်းတံ ဗိုန်ပယာ်; ဆာင်နမ်း၊ စီဟည်စာ်မးဒဲးလ်အချိုင်အန်; စံဝ်ဖြားစီဆူည်,မေဆိယ လေးဒဲးလ် တဲင်းကတာည်းကံမ်ဖာနီးဟံ့။

၂၂။ ဘဉ်ဘဉ်းကိုတ်းဒေး ယောဟာန




ကျမ်းလုကာ ၁



ဓါည်းဟောကလောင်းပရောဖဲတ်ချေးလဘာန်ဒိုအီး တံ့ယုဒကဲ ဂေါည်း
 ဟည်ဘိုန်ဒေး ဆောင်နမ်းအန်း ဖိုန်းပယားလေး၊ စံင်နောင်းပါပြို န်းအူချေး စီကတ္ထုး
 ဒေးကအုပ်ကမိုန် တံ့တားစောင်းဂါ၊ အီးဇိုင်ဆာခရိ။ အီးမိုးဆာခရိဒီး ကာည်း
 ပီးအန်း အေးလိဆာဘတ်၊ ကာည်းစီအောင်မဲးမကော်နန်းဓါး ဘာည်းအီး။



စံင်နောင်းပါပြို န်းဒါး တံ့ဆာခရိ "မည်းနံင်မဲးဒေး ကော်နန်းအီးမည်း အူချေး။
 လိုဒေးအန်းဇိုင် ယောဟာန်နား။ အန်းစီနံင်မိုးပေါ၊ ပရောဖဲတ်အီးများတ်ဒါင်းအူချေး
 ဇိုအည်လေးဒေးမေဆိယဒီး။" ဘိုန်ဇဲန်း ဆာခရိစီဒါး "ယာည်းပီးအံင် ဟည်ဘူ
 နှေးယောင် နံင်မဲးကော်နန်းဓါး။ ယာည်းမာ် ဟည်ဂါ၊ခည်း။ ပံင်နံင်ဘာည်းဒေးလှေ
 ဒီး၊ ဆာ်စီမိုး အီးမိုးအီးမှာန်အန်းအည်း မှဲအံင်နံင်ဘာည်းနား။"



စံင်နာင်းပျိုပျို န်းစီဒါ်း "စာအံဝ်းနံင်ဒိုည်းဒေးခါဝ်ဆတောင်းလှေနှီး စံဝ်ဖြား
 ဟည်ဆူည်,အံဝ်း ဒေးဇူးပျို မည်း။ မည်းဒီး ဂေါ,မိုးမည်းအာဝ်ညှေမ်အံဝ်း
 မည်းနံင်ဘူဆမားမကလောင်းကျော; ဂါကော်န်းအီးမည်းမည်း ညှိမ်ကိုတ်းဒေး။”
 ဘိုန်ဇဲန်း ဆာခရိမ် ဟည်ဘူဆမားမ ကလောင်းကျော; ပေါ,အူတ်န်း။ ဓါည်းဒီး
 စံင်နာင်းပျိုပျို န်းမာ် ဟည်လည် လေးစီးဟောင်း။ ဘိုဝ်ဒေးစာ်မး ဆာခရိတ်ာ်
 ပျို ခလေပ်အန်း၊ ပီးအန်းမာ် ဟည်ဒိုည်းအူန်းတိုးဇာ်န်း။



ဘိုဝ်စာ်မးတက်အချိုင် အေးလိဆာဘတ်ဒီး ဒိုည်းတိုးဇာ်န်းအန်း ဟည်နိုက်
 တိုင်တောပကျိုဝ်း၊ အီးမိုးစံင်နာင်းပျိုပျို န်း အီးဒေးဇူး ပျို ဆာခရိဒိုဝ်း အန်းစီဟောင်း
 ဇူးလာ်ဘိုး ပျိုမာရိ အန်းအီးမိုး ခြိုဝ်းအေးလိဆာဘတ်။ ခည်ဇုင်ဒီး မာရိမာ် ဆိုင်ဂီ
 မိုးလို့ည် အီးလိုည်းစဲတ်၊ မိုးလို့ည်ကာည်းယောတဲတ် စီဟည်လည်အူန်းဟော်ည်၊
 ကပါဝ်း။ စံင်နာင်းပျိုပျို န်းဒီး စီဒါ်း တာ်မာရိ “မည်းနံင်ဒိုည်းတိုးဇာ်န်း နံင်ပျေးမဲး
 ကော်န်းအီးမည်းအူချေးနာ်း။”



စံင်နာင်းပျိုပျိုနန်း စီဒါးတံ့မာရီ “ကော်န်းအီးမာည်းမည်းချေးဒီး လိုတာင်ဒဲး အန်းဇိုင်ယေဆုနား။ အန်းနံင်မိုးမေဆိယ။” ဘိုန်ဇဲန်း မာရီမာ် စီဗီးဒါး “အီးနီး ဘာည်းမဲ့ အန်းနံင်ပေန်ဒဲး၊ အံင်ဆိုင်ဂီမိုးလို့ည် အီးလိုည်းစဲတ်။” ဘည်ဘာည်း မာ် စံင်နာင်းပျိုပျိုနန်း စီဗီးကလောင်းဒါးဘိုး “ဂေါ၊မိုးဗိညေန်ချို၊ဆင်းစံင် မည်းစီ ကတူး ဒိုည်းတိုးဇ်နန်း။ ဂေါ၊မိုးဘာည်းဇဲန်း ကော်န်းအီးမာည်းမည်းချေးဒီး အန်းမိုး ပေါ၊ ကော်န်းစံင်ဖြား အန်းအီးဒါင်းဇေးဒိုုခူအီးဟာ်။”



ဓါည်းဒီးအာင်လှာ်နန်း မာရီစီဟောင်းလှယ်လာ် ပျိုခလဲပ်ခြိုဝ်းမျိုအန်း အီးမိုး ပျိုအေးလိဆာဘတ်။ အေးလိဆာဘတ်ဒီး စံန်အန်းယဲင်ဟာ်မံးတဲ၊ မာရီတံ့ အန်း၊ ကော်န်းအီးဂေါ်ည်းခဲင်းမဲတ်အန်း ဟည်မဲန်ရည်းပေါ၊။ အီးပန်းအယ်ချေး ကာည်းဒီး၊ ကာည်းခိုည်းလာ်ခည်း ပံင်မဲ့မ်အာမ်း အီးမိုးဘည်ဘာည်းရဲန်း စံင်ဖြား တံ့ကာည်း။ မာရီစီဂေါ်ည်းဒမ်းလာ်ဒါး ပျိုခလဲပ်အေးလိဆာဘတ် ကံပ်ဘိုန်းအိုည်းပကျိုဝ်း ဓါည်းဒီး အန်းစီကော်လာ်ဗီးဗီးဟောင်း ပျိုခလဲပ်အန်း။



ဘိုဝ်ပျေးဟော်ညည်,အေးလိဆာဘတ်တတ် ကော်န်းအီးမာည်းအန်း၊ ကဲစီဒဲးပေါ၊
ကော်န်းအီးမာည်းဒီး ဇိုဝ်ယောဟာန်၊ တော,တတ်ဘာည်းတတ်မ်းအူန်း စံင်နာင်း
ပျိုပျိုန်း။ ဘိုန်ဇဲန်း စံင်ဖြားစီဗီးဒဲးလတ် ဆာခရိဒီး ဘိုန်းဗီးကလောင်းကျော့။ အီးမိုး
ဆာခရိ စီဒါ်း “ဇိုက်ပိုက်အူန်းစံင်ဖြား၊ အန်းအာဝ်ဘီးမ တူအီးအန်းကဲ ခံဝ်ဘော်က်
နလူးအူန်းဆေဆေ။ တူအီးကဲမာ် နံင်တေ,ဒါ်း တံ့ကော်န်းအံဝ်းနီး မိုးပရောဖဲတ်
စံင်ဖြားအီးဒါင်းဇားဒိုခူအီး။ မည်းနီး နံင်မိုး ချေးအီးနံင်အိုမ်ဘျာည်းရဲန်းဒဲး
အိုန်ဒါ်းဒဲး မေဆိယဟာ်။”

၂၃။ ဘဉ်ဘဉ်းကိုတ်းဒေး စံဝ်ယေဆု



မတဲ ၁၊ လုကာ ၂



ဘိုဝ်နာ်,ယောတဲတ်တတ် မာရီဟည်ဒိုည်းတိုးဇာ်နး၊ အန်းစီဒါ်;နံင်ဒဲဝ်းဗိုန်မာရီ
ဂေါ,မိုးအန်းနာ်, အာဝ်မိုးကော်နးအန်း။ ဘည်ဘာည်းမာ် စံင်နာင်းပျိုပျိုန်း စီလေးဒဲး
ကျော; တံင်ခဲင်းအိအိုမ်ပါဝ်းအန်း အာည်,ဒဲဝ်းဗိုန်အန်းတံဘာည်းဇဲနး။



စံင်နာင်းပျိုပျိုန်း စီဒါ်;တံဘာည်းယောတဲတ် “ယောတဲတ် ခူအိုင်ဂီးနး; စာမည်း
နံင်ခါ်,လာည်းမာရီဒီး။ မိုးဂေါ, ဗိညေန်ချို,ဆဝါးစံင် အန်းစီကတူးဒိုည်းတိုးဇာ်နး။
အန်းနံင်ကိုတ်းပျေးလေး; ကော်နးအီးမာည်း။ ကော်နးအီးမာည်းချေးဒီး မည်းစီဒဲး
အန်းဇိုင်ယေဆုနး။ ဆိမ်ဘာည်းဆံမ်ဒါ်;လာ်ဘာည်းဇဲနး ချေးဒီး ဂေါ,အန်းမိုး
ချေးအန်းအီးနံင်ချော်တ်လာည်းတူအီးကဲပျိုပည်မဲး ဒပံင်ကလူည်,ကဲ။”



ဂေါ,မိုးဘာည်းဇဲန်း ယောတဲတ်စီခါ,လာည်းမာရီ။ ဘည်ဘာည်းမာ်
အန်းအာ်အိ အာ်ဂေါ်ည်းတော,မ မာရီ၊ တော်မာရီ ညှိမ်ပျေးဓါး
ကော်န်းဓါးချေးဒီး။



ဘိုဝ်ဟည်ကစမ်ဒေးတတ် ပကျိုဝ်း မာရီနံင်ကိုတ်ပျေး ကော်န်းဓါးအန်း၊
တူအီးဒါင်းယောမကဲမာ် စီဖျာဝ်ခါ်ဆတောင်း ဆူည်,တူအီးကိုင်းကဲပါပည်မဲး
ဓိးဓိးဒိုပိုဂေါ်ည်းဆိပိုဂေါ်ည်းအန်း စာနံင်ကဲပ်စရောင်း တူအီးခဲင်းကိုင်း။ ဂေါ,မိုး
ဘာည်းဇဲန်း မာရီကာည်းယောတဲတ်မာ် စီယာ်ည်,ပေါ,ပို လှိုင်းဒီဂေါ်ည်းကာည်း
အီးမိုးနာဆရဲတ်ဒီး လည်လေးဟောင်းအိုန်ဒါ်နဲးဒိုင်း စာကာည်းနံင်ဟောင်းဇူးလာ်
ပို လှိုင်းဘဲတ်လိင်။



ဘိုဝ်ဟောင်းစမ်းကာည်းတာ် ပါ့လှိုင်းဘဲတ်လိင်၊ ကာည်းအာဝ်မဲးမ
 ဒီနံင်ချူ၊ဒီနံင်ဒါမ်းလာ်ဒါး ဂေါ၊မိုးအီးငေးကဲဂိုန်းယာဝ်း။ ကာည်းစီကတူးလှိုည်ဖ်း
 ချူ၊ဒါမ်း ပါ့ချိုင်မက်။ ဘိုန်ဇဲန်း ကော်န်းကာည်းမာ် ဟည်ကိုတ်းလာ် ပါ့ဒီး၊
 ဂေါ၊မိုးကာည်းအာဝ်မဲး ဒီနံင်ပအိကော်န်းဒဲးငဒီး၊ ကာည်းစီဒဲးလာ် အန်းအိအူန်း
 တိုင်ကလဲဲ၊ဟိုမ်းမက်။ ကာည်းစီတာင်ဒဲး ကော်န်းဒဲးဒီး ဇိုဝ်ယေဆု။



ခည်ဆဲမ်းဒီး စီမဲးလာ် ကဲအီးချိုင်းပူးအူယှိုင် ဂီဂေါ်ညးအူန်း ပါ့ဘျည်းပါင်
 တိုင်ရိမ်းကဲကဲဒီး။ ဇိုယာမ်းဇဲန်း အီးမိုးစံင်နာင်းပါ့ပျိုန်း အန်းအီးဟိုဝ်ပျိုင် စီလေး
 ဒဲးကတိုင်ကတာင်၊ ဂေါ၊မိုးဘာည်းဇဲန်း တူအီးချိုင်းပူးကဲကဲဒီးမာ် ဟည်ကစား
 ကဒိုန်းယံဝ်းပေါ၊အခည်း။ စံင်နာင်းပါ့ပျိုန်း စီဒဲးကလာင်း တာ်ကဲအီးချိုင်းပူးကဲ
 စီဒါ် “ပဲခူယံဝ်းနား။ ဂေါ၊မိုး အံဝ်းဒိုည်းဒဲးဆတာင်းအီးမဲမ်ခိုည်းစာပဲ။
 ခည်ဆဲမ်းအိုင်ဒီးနီးပေါ၊ မေဆိယဒီး အန်းဟည်ကိုတ်းဒဲးဟော်ညး။”



အန်းစီဒါးတံ့ကဲ “ပဲစီဟောင်းတြာ်ညးကော်န်းဒဲးဒီး၊ ပဲမာ် နံင်ယဲဝ်းအီးဒါး တံက်ပည်းအူန်း ဂီပအိအူန်းအန်း တိုင်ကလဲ၊ဟိုမ်းမက်။” ဇိုယာမ်းဇဲန်း စံင်နာင်းပျိုပျိုန်းကဲ စီလေးကတိုင်ကတာင် ဒေးပေါ၊အူတ်န်းပျိုပျိုန်း၊ ကဲစီ ဇိုက်ဖိုက်တေးကနေးစံင်ဖြားတံန်တော၊ စီဒါးဒို “ပျိုပျိုန်းဇားမာ် ဖုင်းတာန်ခိုး အန်းစံင် ဒါင်းဇားပေါ၊အခည်း။ တေင်းကတာည်းကံမ်ဖာနီးပါပည်မဲးမာ် နှာင်း နိုမ်းယေန်ဆာချို၊ ဒဲးတူအီးကဲ မဲးနေားလည်ကမဲးလည်ကဓါည်းဒိုနား။”



ဘိုဝ်ဟောင်းစာ်မးကဲအီးချိုင်းပူးကဲကဲဒီးတံာ် ပျိုကောန်းဒဲးယေဆုဒီး၊ ကဲစီ ဟောင်းယဲဝ်းပေါ၊ ကော်န်းဒဲးဒီး ဂီအိအူန်းတိုင်ကလဲ၊ဟိုမ်းမက် တော၊တံာ်ဘည် ဘာည်းကလောင်းအူန်း စံင်နာင်းပျိုပျိုန်းဒီး တံ့ကဲ။ ကဲမာ် နေားခိုည်းအာမ်းလာ် ပေါ၊အခည်း၊ မာရိမာ် ဟည်ခိုည်းပေါ၊ခည်းခည်း။ ဓါည်းဒီး ကဲစီမီးမီးဟောင်း ပျို ဘုည်းပါင်တိုင် ဒီချိုင်းကဲတံ့ပူး၊ ကဲစီဇိုက်ဖိုက်ခိုည်းတော၊ တေးကနေးစံင်ဖြား တော၊တံာ်ဘည်ဘာည်း ပံင်နာ်၊ပံင်ယဲဝ်းဒေးကဲကဲဒီး။



ဓါည်းဒီးတာန်တာန်အန်း၊ တူအီးနာ်,အီးမဲးပိုင်ညာ ကဲအီးဂေါ်ညး ပျီ ကိုင်း
 ညှာလေး; ဆာင်ငည်း ကဲစီယဲဝ်းလာ် လာ်အူပိုင် အန်းအီးမဲးမဲးအာမ်းပေါ,အည်း
 ပျီပျီ န်း။ ကဲမာ် ဟည်နာ်,အူန်းမိုးတာ် ဘည်ဘာည်းပံင်ဆိုင်ဒါ်; လာ်ဒီး၊ မိုးအန်းအီး
 နဲဒါ်; တားကညားဒါင်းယုဒကဲ ချေးတမည်း ဟည်ကိုတ်ဒေး။ ဂေါ,မိုးဘာည်းဖဲန်း
 စာကဲနံင်ဟာ်ဂျေပ် တားကညားဒါင်းတမည်းဒီး၊ ကဲစီလည်လေးဟာ်အိုန်ဒါ်န်း
 ဟာ်လှာ်န်းပေါ,ခည်း တော်ကံပ်စာ်မံး ပျီ လှိုင်ဘဲတ်လိုင်၊ ကဲစီဒေးယဲဝ်းပေါ,
 ပျီ ဒီကိုတ်ကော်န်းဒဲယေဆုဟာ်။



ကဲကဲဒီးမာ် ဟည်တော,ဟာ်လာ် လဘာ်န်းလာ်ဒါင်းဒီး။ ဘိုဝ်ယဲဝ်းကဲ
 တံင်ယေဆု၊ ကဲမာ် စီအံက်ဆကျူ, ဂျေပ်အန်းစံင်။ ဓါည်းဒီး ကဲစီကပါင်းဒဲး
 ဂျိုးပံင်ဒိုည်းဒေးအီးမဲးငေါ,မဲးခံန်းဒီးမာ်; စီမီးမီးဟာ်လာ် ပျီ ဂေါ်ညးကဲ။

၂၄။ ယောဟာန်ဒဲးဘပ်တိစမ် တံ့စံဝ်ယေဆု




မတဲ ၃၊ မာကု ၁:၉-၁၁၊ လုကာ ၃:၁-၂၃




ဘိုဝ်ဒါင်းဒေးယောဟာန် အန်းစီပေန်ဒေးလ်ပရောဖဲတ်အူချေး။ အန်းစီ
ဂေါ်ညးလ်ဒါး ပ္ဍဲဘျည်းပါင်ဒါင်း စီဂေါ်ညးဟိုမ်းလ်ဒါး ငါမ်းဖျိုဝ်းဘျည်း ကာညး
အဒိုး။ အန်စီချေပ်လို့ည် တဆီးပံင်တံက်ဒါးဟိုက်ကလာအိုက်။



အန်းဟောကလောင်းဒါ်း "ကညွည်နော့ပဲ၊ ဂေါ၊မိုးကိုင်းစံင်ဖြား ဟည်မိုးပေန်
ဒေး။" တူအီးကဲမ် ဒေးတညောင်းလာညး ပံင်ဟောကလောင်းအန်းဒီး ဂိုန်းလ်ပေါ၊
အခည်းဟံ့။




ကဲအီးယဲဝ်းတညာဝ်း ပံင်ဟောအန်းကဲကလံက်မာ် ကဲဟည်လှေ့နော့ကဲ စီခံမ်လာည်းဒို့ ဘပ်တိစမ်ဇဲပ်အဲမ်း တံ့အန်း။ ဘည်ဘာည်းမာ် အီးမိုးတြာ ကံတ်ကျာမ်းကဲအီးအာဝ်လှေ့နော့ အာဝ်ပျိုဝ်းကလောင်း ပံင်ကလူည်ကဲမာ် ကဲဒဲးခံမ်လာည်းဘပ်တိစမ်ဇဲပ်အဲမ်း ဂိုန်းပေါ,အခည်း။




ယောဟန်စီဒါး တံ့တြာကံတ်ကျာမ်း ကဲကဲဒီး“ဟန်းဟာည်းကဲနူး၊ ပဲမာ် လိုလှေ့နော့ပဲ စီအိုမ်ဘျာည်းဒို့ အကျောင်းဆိအကျောင်းအန်း။ တင်းပျိုည်း အန်းအီးဘူပျိုည်းကဲဒီး နံင်ကတူးအီးကလံက်ဟပ်ဗိုန်ဒို့ တံင်ငည်း။” အီးနီးမိုး ပေါ, ဟည်ပေန်ဒဲး ပံင်ဟောကလောင်းအူန်း ပရောဖဲတ်ဟောဆာယ အီးဒါး “တိုဝ်းဟံင်း အံင်းနံင်ပွေးဟောင်း စံင်နောင်းအီးကလောင်းခါဝ်လအာည်,မည်း စာနံင်အိုမ် ဘျာည်းရဲန်းအိုန်ဒါ်နဲးခံက်မည်း။”



ယုဒကဲကလံက်မာ် စီးမော့ဒါ်; တံ့ယောဟာန် “မည်းမိုး မေဆိယဟိုဝ်။”
 ယောဟာန်စီဒါ်; “အံဝ်းအာဝ်မိုးမ မေဆိယ။ ချေးအန်းအီးနံင်ဒေး; လဘာ်န်း အံဝ်း
 ဒီး အန်းမိုးချေးအီးဗျာတ်ဒါင်းမှယ်အံဝ်း၊ စာနံင်ကားလို့ည် တံ့ဗည်းခနပ်အန်းမာ်
 အံဝ်းအာဝ်ကိုင်မလာ်မူကားပူည်ဒေး။”



ဓါည်းဒီးအူဆဗည်း ယေဆုစီဒေးခံမ်လာည်းဘပ်တိစမ်ဇဲပ်အဲမ်း တံ့
 ယောဟာန်။ ယောဟာန်စီဒါ်; “တိုဝ်းဟံင်း ပူးဒဲစံင်ဖြားနီး၊ အန်းမိုးပေါ၊ ချေးအီး
 နံင်ခံမ်လာည်းဟာဝ်းဒို့ အိုင်လွဲတ်တူအီးလောကနီးပါပည်မဲး။”



ယောဟာန်စီဒါ; တံ့ယေဆု “အံဝ်းအာဝ်ကိုင်မ ဒဲးဘပ်တိစမ်ဇဲပ်အဲမ်း တံ့မည်း။ မိုးလို့ည်မည်း နံင်လိုဗီးဒဲး တံ့အံဝ်း။” ဘည်ဘာည်းမံင် စံဝ်ယေဆု စီဗီးဒါ; တံ့အန်း “မည်းမိုးပေါ, ချေးအီးလိုဒဲးတံ့အံဝ်း ဘပ်တိစမ်ဇဲပ်အဲမ်း။ ဇိုင်းလှေ့နီးမိုးဇိုင်းပံင်လိုမည်း တံ့လာ်ရဲန်း။” ဂေါ,မိုးဘာည်းဇဲန်း ယောဟာန် စီဒဲးဘပ်တိစမ်ဇဲပ်အဲမ်း တံ့ယေဆု။ ယေဆုဒီး အာဝ်မိုးမ အန်းမဲးဒါးပံင်က လူည်, စီဒဲးခံမ်လာည်းဘပ်တိစမ်ဇဲပ်အဲမ်း။ စံဝ်ယေဆုဒီး အန်းအာဝ်မဲးမ ပံင်ရဲန်းကလူည်,ခံင်ဘော်ကံ။



စံန်စံဝ်ယေဆု ဟော်ည်,ဇဲပ်အဲမ်း ဇိုယာ်ည်,ဒဲးအန်း တိုင်အဲမ်းဒီး၊ အီးမိုးဗိညေန်ချို,ဆငါးစံမံင် ဟည်ရဲန်းဘာည်းဆိမ်းအပျိုည် စီလေးဒဲးတံက် ပေါ, တိုင်တဲင်းစံဝ်ယေဆု။ ဓါည်းဒီး စီမဲးလာ်ဟာ်မ်း အီးကျားလေးဒဲး ပျိုပျိုန်း စီဒါ; “မည်းမိုးကော်န်းကမဲးအံဝ်း၊ မိုးချေးပံင်ကျိုက်အံဝ်းဟံ့။”



စံဝ်ဖြားစီဒါ်;တံ့ယောဟာန် “ခဲင်းပံင်ဒဲးမည်း ဘပ်တိစမ်ဇဲပ်အဲမ်းကဲကဲ
ဒီး အူချေးချေး၊ အီးမိုးဗိညေန်ချီ,ဆင်းစံင် နံင်လေးဒဲးတဲင်းအန်း။ ချေးဒီး
အန်းမိုးပေါ, ကော်န်းစံဝ်ဖြားဟံ့။” စံဝ်ဖြားအခည်း အန်းမဲးလှိုည်အူဆူ။
ဘည်ဘာည်းမံ စံဝ်ဖြားဒါ်;အီး အန်းမိုးအိုည်းပါး ကစုပေန်အူဆူ ကဲကဲဒီးမိုး
ကူန်းစံဝ်၊ ကော်န်းစံဝ်၊ ဗိညေန်ချီ,ဆင်းစံင်ဟံ့။

၂၅။ ခုန့်ဆိုင် ကံဝံးယော် ခလံဝံး စံဝံယေဆု



မတဲ ၄:၁-၁၁၊ မာကု ၁:၁၂-၁၃၊ လုကာ ၄:၁-၁၃



စံန်စံင်ယေဆု ခံမ်ဟော်ညည်,ဟ်းဘပ်တိစမ်ဖဲပ်အဲမ်းဒီး၊ ဓိညေန်ချီ,ဆင်းစံင်
 စီယိုင်းဟောင်းလော်ပေါ, စံင်ယေဆု ပျိုခဲင်းဘျည်းပါင်ဒါင်း။ အန်းစံင်စီစောင်း
 ပံင်ဟိုမ်း ပျိုခဲင်းဘျည်းဒီး ဖိုန်းကိုင်းဆင်ည်း။ ဇိုယမ်းဖဲန်း အန်းစီကတူး
 ကညားလော် ခုန်ဆိုင် ဂီကံင်းယော်ခလံင်းအန်း ပျိုဒီး။



ခုန်ဆိုင်စီဒဲးကံင်းယော်ခလံင်းအန်း ဒါ်း “ဆာ်မည်းမိုး ကော်န်းစံင်ဖြား
 ခည်းခည်း တဲးကျိန်းမာ်းကဲနီး စီရဲန်းဒဲးဟံင်း အန်းပေန်ပံင်ဟိုမ်း။”



စံဝဲယေဆုစီဗီးဒါ်; တၢ်ခူနဲဆိုင်ဒီး “ခဲင်းဘေ,ကျာမ်း ကလောင်းဒါ်;အူနဲး တူအီးအာဝ်မိုးမ အဆာက်အီမ်းဂေါ,ပံင်ဟိုမ်း။ အနဲးအဆာက်အီမ်းလိုင် ဂေါ,ကျော; ပံင်ကလောင်းဒါ်;အူနဲး စံဝဲဖြား။”



ဓါည်းဒီး ခူနဲဆိုင်စီယိုင်းဟောင်းဘိုး စံဝဲယေဆု ပျိုစိက်စောင်းစံဝဲဖြား၊ စီဒါ်; “ဆာ်မည်းမိုး ကော်နဲးစံဝဲဖြားခည်းခည်း ဝဲနဲးဇေးလေးဟံင်း ဒီချေမ်း။ အနဲးအာဝ် မိုးဟိုင် တိုင်ခဲင်းဘေ,ကျာမ်း ကိက်ဒါ်;အူနဲး၊ ‘အနဲးစံဝဲနံင်ဆူည်, စံင်နာင်း ပျိုပျို နဲးအနဲးကဲ၊ ဇိုက်ကောင်းဒဲးမည်း နှာင်းဇာ်နဲးမည်း ကံပ်ဘူလံက်တံင်မာင်း။’”




ဘည်ဘာည်းမံ စံယေဆုစီမီးဒါး; ဘိုး တံ့ခူန်ဆိုင်ဒီး “တိုင်ခဲင်း
 ဘဲ,ကျမ်း ကလောင်းဒါးအူန်း၊ 'မည်းခူစမ်းတိုဝ်း စံကညျား အီးမိုး စံဖြား
 မည်းနား'။”



ဓါည်းဒီး ခူန်ဆိုင်စီနဲ့ဘိုး အန်းစံတိုဝ်း ဂါဆိုင်မိုး ကိုင်းလှိုင်းကဲအီးဂေါ်ည်း
 တောင်းကံမ်ဟနီးပါ်ပည်မဲး ကာည်း အီးတချား တောင်းကိုင်းလှိုင်းကဲကဲဒီး၊ စီမီး
 ကံမ်းယော်ခလံဝ်းဒါးဘိုး တံ့အန်းစံ “ဆာ်မည်း ဆကျူ,ဂျေပ်အံဝ်း၊ အံဝ်းနံင်ဒဲး
 ဒို့တံ့မည်း ကိုင်းလှိုင်းပံင်နဲ့အံဝ်း တံ့မည်းကဲနီးပါ်ပည်မဲး။”




ဘိုန်ဇဲန်း စံဝဲယေဆုစီမီးဒါ်; တာ်ခူန်ဆိုင်ဒီး “ အိုည် ခူန်ဆိုင်၊ မည်းလည်
 လေးဒဲင်းဟောင်းပေါ၊ ဒအံဝ်း။ ခဲင်းဘဲ၊ကျာမ်း ကိက်ဒါ်အူန်း 'မည်းလိုလို့ည်
 ဂျေပ်စံကညျား အီးမိုးစံဖြားမည်းနား'။”




ခည်ယာမ်းဇဲန်း ခူန်ဆိုင်ဒီးမာ် ဟည်လည်လေးဒဲင်းဟောင်းပေါ၊ ဒစံဝဲယေဆု။
 စံင်နာင်းပျိုလ္လီုန်းကဲမာ် ဟည်လေးဒဲးစာ်မီးပေါ၊ စာနံင်ဒဲးတိုဝ်းမေန်း ရဲန်းချိုင်း
 အန်းစံဝ်။


၂၆။ စံဝ်ယေဆု တယ်ရဲန်း မိင်းစံဝ်




မတဲ ၄:၁၂-၂၅၊ မာကု ၁:၁၄-၁၅၊ ၃၅-၃၉၊ ၃:၁၃-၂၁၊ လုကာ ၄:၁၄-၃၀၊
၃၈-၄၄



ဓါည်းအန်းစံင် ဘယ်ခလော; ခုန်ဆိုင်ကံးယော်ခလံးအန်း၊
 ဂေါ၊မိုးဖုင်းတာန်ခိုးဓိညေန်ချို၊ဆငါးစံင်၊ အန်းစီဗီးဒေးစ်မ်းလာ် ပါ့ အရာပ်ဂါလိလဲ။
 အန်းစီလှယ်လာ်ဟောကလာင်း ခါင်ဆတောင်းအီးမဲ့မ်းခိုည်း အူဒီဟော်ည်၊အူဒီ။
 အန်းမာ် ဘိုန်းဆရေငါည်းချို၊ လအာည်၊တူအီးကဲပါ်ပည်မဲး။




စံင်ယေဆုစီဟောင်းစ်မ်း ပါ့ လှိုင်းနာဆရဲတ် အီးမိုးပါ့ လှိုင်း ဒါင်းဒေးအန်း။
 ဘိုတ်စ်မ်းဒေးဆငည်းဆတောင်း၊ အန်းစံင်ဟည်လဲပ်ဟောင်းပေါ၊ ဒီဂျေပ်အီးတံ့
 စံင်ဖြား။ ဓါည်းဒီး တူအီးကဲမာ် စီဒေးဘေဲ၊ကျာမ်းပရောဖဲတ်ဟေဆာယ တံ့အန်း။
 အန်းစံင်မာ် စီဟည်ဗိုင်းဒီးပေါ၊ ဘေဲ၊ကျာမ်းဒီးဟံ့။



“စံဝ်ဖြား ဟည်ဆောင်းဟပ်ဒဲး; ဝိညေန်ချီ,ဆငါးစံဝ် တံ့အံဝ်း စာနံင်ကလောင်း ခါဝ်းဆတောင်းအီးမေ့မ်ခိုည်း တံ့တူအီးဖျါန်းကဲ၊ ကဲအီးကညားကမ်းမာ် နှာင်းဘိုန်း လော်တ်လေး၊ ကဲအီးငါည်းအာ်,မာ် နှာင်းဗီးယဲဝ်းတိုဝ်း၊ အီးမိုးကဲအီးကညားချိုင် မာ် နှာင်းကတူးပွေးလေးဒိုဟံ့။ တံင်ဆောင်နမ်းနီး ဟည်မိုးပေါ, ဆောင်နမ်းအီးနိုက် ကေးစူးစံဝ်ဖြားဟံ့။”



ဓါည်းဒီး စံဝ်ယေဆုစီအံက်ဂေါ်ည်းလားဒါး ပါ ဒီး။ ဘိုန်ဇဲန်း ကဲအီးဂေါ်ည်း ရီမ်းကဲကဲဒီးမာ် ဟည်ဒဲးဇူး ပါ အန်းစံဝ် စီတိုဝ်းဒိုအန်းဟံ့။ ကဲမာ် နာ်,အူန်းပေါ, ဘေ,ကျာမ်းလှေဒီး ကလောင်းဒါး လောင်မေဆိယဟံ့။ စံဝ်ယေဆု စီဒါး "ကျေား တည်းလှေနီး ဟည်ဘာည်းဒဲးပေါ,အည်းဟံ့။" ကဲကဲဒီးပါပည်မဲးမာ် ဟည် အာမ်းပေါ,ခည်း စီဒါး "ချေးနီး အန်းအာဝ်မိုးဟိုဝ် ကော်န်းအီးမည်း ယောတ်တ်။”



ဓါည်းဒီး စံဝဲယေဆုစီဗီးဒါ်းလ်းဘိုး "အံဝ်းနံင်ကလောင်း တံ့ပဲအီးမိုးအီးမှာန် အန်း၊ ပရောဖဲတ်ချေးမဲ့မံ အာဝ်မဲးမ ချေးအီးဘိုန်းဇိုဝ်ဘိုန်းငါည်း တံ့ လအာည်, ပါ်ဒီကိုတ်းဒီဂေါ်ည်းကဲ။ ဇိုခည်ဂီဂေါ်ည်းအီမ်း ပရောဖဲတ်အေးလိယ၊ တိုင်ခဲင်းကိုင်းအိတရေလဒီး စီမဲးလ်း ယားကမာည်းကဲ ဂိုန်းပေါ,အခည်း။ ဘည်ဘာည်းမံ ဇိုအဲမ်းကွာည်းဘူဇေး တံင်ဘျည်းအိုည်းဆာင်နမ်းလေး၊ စံဝ်ဖြား အာဝ်ဆူည်,မ ပရောဖဲတ်အေးလိယ ဟာဝ်းကဇော်ည် တံ့ယားကမာည်း ကဲအီးဂေါ်ည်း တိုင်ကိုင်းအိတရေလဒီး။ အန်းစံဝ် စီဆူည်,လို့ည် အေးလိယ ဟာဝ်းကဇော်ည်ဒဲး တံ့ယားကမာည်း အန်းအီးဂေါ်ည်းပါ် ကိုင်းဒီဟည်း။”




"ဒဇဲန်းအာဝ်ဓါ်းနံ ဇိုပရောဖဲတ်အေးလိယ၊ တူအီးပေန်တူတ်,ကဲမံ ဂိုန်းလ်း ပေါ,အခည်း တိုင်ကိုင်းအိတရေလဒီး။ ဘည်ဘာည်းမံ ပရောဖဲတ်အေးလိယ အာဝ်ဆားနမ်းဒဲးမ ကဲခံဝ်ချေး။ အန်းဟာဝ်း ဆားနမ်းဒဲးလို့ည် တားအောဒါင်း ကော်န်းနာန်းကဲ အန်းအီးဇိုဝ်နေမာန် အီးမိုးယာန်ဆူအိတရေလကဲဟံ့။” ဘိုဝ်ဗီး န်,ကဲတံ လော်င်ကဲကဲဒီးပါ်ပည်မဲး၊ ကဲစီဆိုင်ဇာဝ်းယာဝ်းလ်းပေါ,အခည်း။




ဘိုဝ်ဘာည်းတံ့ဖဲန်း တူအီးကဲမာ် ဟည်တိုတ်,လာက်းလည်လေးဟောင်းပေါ, စံဝ်ယေဆု ဒခဲင်းစော်င်းစံဝ်ဖြားဒီး၊ စီယိုင်းဟောင်း ပျံလအောင်းအူဒီဒီ ရိန်းဒါးနံင် ဟောင်းစူန်းကပျံက်ဇေးစိုန်အန်း။ ဘည်ဘာည်းမာ် စံဝ်ယေဆု စီလဲပ်ဟောင်း တိုင်ခနားတူအီးဂိုန်းကဲကဲဒီး၊ ဟည်လည်လေးဒဲင်း ဒကိုင်းနာဆရဲတ်ဒီးဟာ်။



ဇိုခလေားဟောင်းအန်းစံဝ်တံာ် တော,အရာပ်ဒီ၊ တူအီးကဲအီးဒဲးဇူးအန်းမာ် ဂိုန်းပေါ,အခည်းဟာ်။ ကဲမာ် တေ,ယိုင်းဒဲးဒို ဂါဆိုင်မို; တူအီးဆဲင်းကဲ အီးမို; တူအီးငါည်းအာ်, တူအီးချိုက်ကအောင်း၊ တူအီးဘူဆမားကျော; တူအီးဇာ်နး တည်းဘူပဲန်ကဲ ပျံစံဝ်ယေဆု။ အန်းစံဝ်မာ် ဆားနာမ်းဒဲးဒို တူအီးဆဲင်းကဲကဲဒီး ဂဲန်းဒိုဟာ်။




ကဲမာ် တဲ,ဒဲး;စံမ့်ဘိုး တူအီးကဲအန်းအီးကနမ်းဇေင်လဲပ် ပါ့စံယေဆု
 ဂိုန်းပေါ,အခည်း။ အီးမိုးကနမ်းဇေင်ကဲမာ် စီလည်လေးဒဲးဖမ်း ဒတိုင်တူအီးကဲဒီး
 စီကည်ကည်ရိုင်းအောင်း ဒါး "စံယေဆု မည်းမိုးပေါ, ကော်န်းစံဖြားအခည်း
 ဟာ့။" တူအီးကဲမာ် ဟည်အမ်းလာ်ပေါ, ပံင်ဘာည်းလှေဒီး၊ စီဂျေပ်စံဖြား။



ဓါည်းဒီး စံယေဆုစီရော့လာည်း တပဲစံအူကိုင်းလေးအယ်ချေး
 စာနံင်တော,လဘာ်န်းအန်း။ ကဲကဲဒီးမာ် ဂေါည်းတော,ဟောင်းတော,ဓီးအန်း
 စီပနံင်းရံပ်လာည်းဒို့ တာ့အန်းစံ ပံင်လိုတာ့လာ်နာ်, တော်န်းမျိုး။


၂၇။ အပိုမ်ကျော့ကကညး ဆမာရီအနးအီးပေန်ပဲနး




လုကာ ၁၀:၅-၃၇



မဲးလ်အူဆငည်း တားတြာကိက်ကျမ်းအူချေး စီဒေးဇူး ပါ့စံဝ်ယေဆု၊
 စာနံင်စာမ်းတိုဝ်း စံဝ်ယေဆု၊ စီဒါး "အိုည်တြာ၊ စာနံင်ဘိုန်းအဆာက်အိမ်းဆေ
 ဆီအံဝ်းနံင်လိုရဲန်း။" စံဝ်ယေဆု စီဗီးမော့အန်း ဒါး "ဘာည်းမဲ့ တိုင်ကျမ်း
 ဆိန်ပိုင်ညာပ် ကိက်ဒါးအူန်း။"




အန်းစီဗီးဒါး "ဒါးဂါအီးမဲးပံင်ကံတ်မည်း အီးမိုးနော့၊ ဖဲမ်း၊ ဟေ့ညာန်၊
 ညွှော်မ်းမည်းပါပည်မဲး တေးကမဲးစံင်ကညျား အီးမိုးစံင်ဖြားမည်းနား။
 ဒဇဲန်းအာဝ်ဇါန်း တေးကမဲးပီဗါး အီးဂေါ်ည်းကတ်မ်ရိမ်းမည်းကဲဒီး
 ဘာည်းမည်းကမဲး တိုးပိုင်းမည်းနား။" စံဝ်ယေဆု စီဗီးဒါးတံ့အန်း "မိုးပေါ၊
 အည်း ပံင်ကလောင်းမည်းကဲကဲဒီး။ မည်းစီရဲန်းတော့ဘာည်းဇဲန်း မည်းမာ်
 နံင်ဘိုန်း အဆာက်အိမ်းဆေဟာ်။"




အန်းစီရဲန်းထောင်ပန်တူအီးအာဝ်မဲးအိုင်လွဲတ်၊ စီဗီးဒါး တံ့စံဝ်ယေဆု
 "နံင်မိုးလာ် ချေးမဲ့၊ မိုးပီဗါးအန်းအီးဂေါ်ညး ကတ်မရိမ်းအံင်။"




ဘိုန်ဇဲန်း စံဝ်ယေဆုစီခည်န့လာ် အပိုမ်ကျေးကကည်းအူမျိုး တံ့အန်း။
 "မဲးလာ်အူဘော်က် စီမဲးလာ်ခြိုဝ်းယုဒအူချေး လည်လေးဟောင်းအိုန်ဒါန်း၊
 အန်းယာ်ညးလာ် ပါ်လှိုင်းယေရုဆလိင် လေးဟောင်းညှာလှိုင်းယေရိခေါ။"




"ဇိုလည်လေးဟောင်းအန်းတံ တော,အိုန်ဒါ်နးဘာည်းဇဲန်း အန်းစီကညား တူအီးစိုန်ကဲ ငါ်;ကယာင်အန်း ကံပ်နှေးနံင်ယာ်မ်း၊ ကဲစီဖာ,လာည်းဒိုဖ်းဂျိုးအန်း စီလည်လေးဟောင်း။"




"ဓါည်းဒီးအူတည် စီမဲးလ် တားစော်င်းယုဒကဲအူချေး; ဂီလေးဒေးတော, အိုန်ဒါ်နးဒီး၊ အန်းစီဒေးယဲဝ်း ဒေးကညားလ် ချေးအန်းအီးကညားတူအီးစိုန် ကယာင်ငါ်;အူန်းဒီး။ ဘိုဝ်ဘာည်းတံ့ဇဲန်း တားစော်င်းဒီးမံ ဟည်ကစိင်ငါည်း ဝဲတ်,ခလေားဟောင်း ဒတူအီးဆဲဝ်းဒီး။"




"ဓါည်းဒီးအာဝ်လှာ်နး စီမဲးဘိုးခြိုဝ်းလေဓိအူချေး၊ ဟည်ဒေးတ်မ်းဘိုး ပါ်ကဆိုင်ဒီး။ (ခြိုဝ်းလေဓိကဲမိုး၊ ခြိုဝ်းခဲင်းယုဒ အီးကဇော်ည်တံ့စော်င်းဒါင်း ကဲ ပါ်စော်င်းစံပ်ဖြား။) အန်းကံပ်ယဲဝ်းအူန်း တူအီးဆဲဝ်းဒီးမာ်အန်းအာဝ် ကဇော်ည်မ၊ ဟည်ဓဲတ်,ခလေားဟောင်းပေါ,။"




"ဓါည်းဒီးအူတည်ဒဲး စီမဲးလတ်ဘိုး ခြိုဝ်းဆမာရိအူချေး၊ ဟည်ဒေးတ်မ်း ပါ်ကဆိုင်ဒီး။ (တူအီးဆမာရိဒါ်းအီး၊ ကဲမိုး တူအီးကိုတ်းလေးဒေး တိုင်ခဲင်းယုဒ အန်းအီးခါ်,လာည်း တူအီးမျိုးဟည်းကဲ။ ဆမာရိကဲ ကာည်း ယုဒကဲ ကဲအာဝ် လည်ကလံက်မ၊ ကဲလည်ကစံင်းအည်း။) ခြိုဝ်းဆမာရိဒီး၊ စံန်အန်း ယဲဝ်းတူ အီးဆဲဝ်းဒီးမာ် အန်းမဲးပေါ,နေား ကဓါည်း။ ဂေါ,မိုးဘာည်းဇဲန်း အန်းစီဟောင်း ဇူး တိုဝ်းမန်းဒဲးပေါ,တူအီးဆဲဝ်းဒီး၊ စီကျည်းဟပ်ဒဲး အဲမ်းပျိုင်းအူညူး ကာည်း အဲမ်းပျိုင်းဆပျိုတ် စီပည်းဒဲးဘိုး ဒီဆဲဝ်းချေးဒီးဟာ်။"



"ဓါည်းဒီး အန်းစီဇိုက်တူအီးဆဲင်းဒီး တာင်တဲင်းလီအန်း၊ စီဟောင်းဇူးလာ် ပျံ့ဂါင်းဒါမ်းအူဒီး။ ဘိုဝ်ဟောင်းစာ်မ်းတာ် ပျံ့ဂါင်းဒါမ်းဒီး၊ အန်းစီတိုဝ်းမေန်းတူအီး ဆဲင်းဒီး ချီ၊ချီ။"




"ဂေါ၊မိုး အန်းလိုလည်လေးဟောင်းဘိုးအိုန်ဒါ်နး တံင်ဆည်းအိုင်ညေး၊ အန်းစီဒဲးအူန်းရိုန်းတဲင်ကား အီးချိုက်ဒဲး တာ်တားကညားဂါင်းဒါမ်းဒီး အာည်၊လည် လေးဟောင်းအန်း၊ စီဒါ် 'တိုဝ်းမေန်းဒဲး တူအီးဆဲင်းနီးချီ၊ချီ၊ ဆာ်ဘူကျပ်းမာ် အံဝ်းနံင်ဒဲးဘိုး ထဲန်ဇေးအန်း ဘိုဝ်မီးဒဲးအံဝ်းနား'။"




ဓါည်းဒီး စံဝ်ယေဆု စီမော့, ဩကံတ်ကျာမ်းဒီး ဒါ်; "ခဲင်းကဲဒီးအိုည်းချွေး၊
 ချွေးမဲ့နံင်မို; ပီဓါးအန်းအီးဂေါ်ည်းကတ်မ်တူအီးဆဲင်း ချွေးအီးကတူးကညားအီး
 ငါ်ဒီး။" ဘိုန်ဇဲန်း ဩကံတ်ကျာမ်းဒီးမာ် စီဓါးဒါ်; "ချွေးအီးတိုင်းမေန်း
 အီးကဓါ်ည်းတူအီးဆဲင်းဒီး မို; ပီဓါးအီးဂေါ်ည်းကတ်မ်အန်း။" စံဝ်ယေဆုစီဒါ်;
 တံ့အန်း "မည်းဟောင်းရဲန်းတော့, ဘာည်းဇဲန်းနား။"


၂၈။ တူအီးချ်မ်း မော့,စာနံင် လေပ်ကိုင်းစံင်ဖြား



မတဲ ၁၉:၁၆-၃၀၊ မာကု ၁၀:၁၇-၃၁၊ လုကာ ၁၈:၁၈-၃၀




မဲးလ်အူဆငညး စီမဲးလ်တူအီးချဲမ်းအူချွေး ဒဲးဇူး ပျီစံဝ်ယေဆု၊ စီမော့ဒါး "အိုဝ် ဩအီးမျာတ်၊ နှာင်းအံဝ်း ကံပ်ဘိုန်းအဆာက်အိမ်းဆေ ဆီအံဝ်း နံင်လိုရဲန်း။" ဘိုန်ဇဲန်း စံဝ်ယေဆု စီမီးဒါး တံ့အန်း "ဆိမ်ဘာညး မည်းဆံမ် တေ့ဒါးတံ့အံဝ်း ဩအီးမျာတ်။ အန်းအီးမျာတ် မဲးလို့ညးအူချွေး။ ချွေးအီး မျာတ်ဒီး အန်းမိုးပေါ၊စံဝ်ဖြားဟံ့။ စာနံင်ဘိုန်းတံ့အဆာက်အိမ်းဆေအခည်း မည်းလိုကျောင်းတော့ဆိန်ပိုင်ညာပ် စံဝ်ဖြားနား။"




ချွေးဒီးစီမီးမော့ဒါး "ဆိန်ပိုင်ညာပ်လှေမဲ အံဝ်းနံင်လိုကျောင်းရဲန်းတော့။" စံဝ်ယေဆု စီမီးဒါးတံ့အန်း "ခုတတ်ယာ်မ်းအဆာက်အီး၊ ခုကလူညးတံ့ အိုင်ဟိုမ်းအီး၊ ခုဘျားဂျိုးအီး၊ ခုကလောင်းအီးဘူမိုးဘူဟန်၊ ယိုဆေကူန်းမား၊ စီမိုးဘိုး တေ့ကမဲး ပီဓါးကဲအီးဂေါ်ညးကစမ်ရိမ်းပဲ ဘာညးပဲကမဲး တိုးပိုင်ပဲနား။"




ဂေါ,မိုး,တူအီးချမ်းဒီး ဆိုင်ဒဲးအီးနာ်,အန်းမိုး တူအီးဆိုင်မှာန်၊ အန်းစီဒါ်း
 "ဆိန်ပိုင်ညာပ်ကဲကဲဒီးပါပည်မဲး; အံဝ်းဟည်ကျောင်းရဲန်းတော,ဒဲး; ဆိုင်ခည်ဒဲး
 အံဝ်း၊ ဆီအံဝ်းနံင်လိုဗီးရဲန်းဘိုး။" ဘိုန်ဇဲန်း အန်းစံဝ်စီဗီးတိုဝ်းချွေးဒီး
 စီမဲးပေါ, နေားကမဲးကဗါည်းတံ့အန်း။




ဗါည်းဒီး စံဝ်ယေဆုစီဗီးဒါ်း တံ့အန်း"ဆာ်မည်းဆိုင်ပေန် တူအီးဆိုင်မှာန်၊
 မည်းစီဟောင်းယံင်းဒို ပိုင်မဲးမည်းပါ်ဒိုဒို စီဟောင်းကဆောင်းဒဲးတံ့တူအီးကဲ
 အီးဖျါန်း။ ဆာ်မည်းရဲန်းဘာည်းဇဲန်း မည်စီနံင်ဗီးဘိုန် ဂျိုးအုက်စာပါ်ပျါ်းနန်း။
 မည်းဟောင်းရဲန်းဟော်ည်,ဟ်းဘာည်းဇဲန်း စီတော,ဒဲး; လဘာ်န်းအံဝ်းနန်း။"




ချေးဒီးမာ် ဘိုဝ်ယဲဝ်းတညာဝ်းအန်းတံာ် ကျော့အန်းစံာ်ဘာညးဇဲန်း
 နော့အန်းဟည်ဘူတခိုညးမဟာ်၊ ဂေါ,အန်းမိုး တူအီးချမ်းမဲးဂျိုးအုက်စာဂိုန်း။
 ဂေါ,လိုင်မိုး အန်းအာဝ်ဘယ်မ စုန်းဗိုန်ဂျိုးအုက်စာပံင်မဲးအန်းဒီး၊ စီလည်လေး
 ဒဲးဟာဝ်ပေါ, ဒဲးစံာ်ယေဆုဟာ်။




ဘိုန်ဇဲန်း စံာ်ယေဆုစီကဗိုင်ဗီးတိုဝ်း ပါတပဲအန်းကဲ စီဒါး လာ်
 "တူအီးမဲးဂျိုးအုက်စာဂိုန်းကဲ စာနံင်လဲပ် တံာ်ကိုင်စံာ်ဖြား အန်းဒည်းပေါ,
 အည်း။ ကလာအိုက် မှု,ခလေးလဲပ် တိုင်ကတဲးဘံင်လတ် စီနံင်ဆိုင်အိုင်
 ဟိုညးအုန်း မှုယံခူချေးအီးမဲးဂျိုးအုက်စာဂိုန်းကဲ နံင်လဲပ်တိုင်ကိုင်စံာ်ဖြား။"




တိုက်ယေဝံးတညာဝံးတပဲအန်းကဲတံ့ဘာည်းဇဲန်း၊ ကဲမာ် ဟည်ကစား
 ကဒိုန်းဒိုပေါ၊အခည်း၊ ကဲစီလည်ဒါ်း "ဆာ်မိုးဘာည်းဇဲန်း ချေးမဲ့နံင်ကတူးလံာ်
 ချော်တ်လာည်း။"



စံင်ယေဆုစီမီးတိုက်လံာ်ဘိုးကဲ စီဒါ်း "ဇိုင်းလှေခိုး တူအီးအာဝံဘယ်မလာ်
 ရဲန်း၊ ဘည်ဘာည်းမာ် အန်းအာဝံမိုးမ စံင်ဖြားအာဝံဘယ်ရဲန်း၊ စံင်ဖြားမိုး
 အီးဘယ်ရဲန်းဒို တော်န်းမျိုးတော်န်းလှေ။"




ဘိုန်ဇဲန်း ပေတရုစီဗီးဒါ်;တံ့အန်းစံင် "အီးမိုးယေးမာ် ယေးဟည်စုန်းဗိုန်ဒို ပါပည်မဲး စီတော,ဒဲး လဘာ်န်းမည်းစံင်။ အကျိုးဆီယေးနံင်ဘိုန်း။"




စံင်ယေဆုစီဗီးဒါ်; "ချေးမဲ့ဘူဒါ်; ဂေါ,လိုင်အံင်; အီးမိုးခလဲပ်အန်း၊ လိုင်နားအန်း၊ ပီဗါးအန်း၊ ခြိုဝ်းမျိုးအန်း၊ ကုန်းမားအန်း၊ ပီးကာည်းကော်န်းအန်း ကဲနီး မျိုးမဲ့ဘူဒါ်; ဆာ်အန်းစုန်းဗိုန်၊ ချေးဒီးခည်း နံင်ဘိုန်းစာမ်အကျိုးအန်း အူပယာ်;တဒဲပ် တံင်စာတ်ဘာ်န်း၊ စီနံင်ဘိုန်းဘိုး အဆာက်အိမ်းဆေဟာ်။ ချေးအီးဂေါ်ည်းဒီဇားစံင်နည် နံင်ကတူးဂေါ်ည်းဒီဇဲမ်းဗါည်းနီး၊ ချေးအီးဂေါ်ည်း ဒီဇဲမ်းစံင်နည် နံင်ကတူးဂေါ်ည်းဒီဇားဗါည်းနီး။"

၂၉။ ဘည်ဘည်းနှင့်ပျိုတ်ဒဲး ပံင်ကလုည့်,အံး



မတ် ၁၈:၂၁-၃၅



မဲးလာ်အူဆဝ်ညး ပေတရုစီမော့,တံ့စံင်ယေဆု ဒါ်; "အိုဝ်စံင်ကညး၊ ဆာ်ပီဗါးခဲင်းအဲရဲန်းကလူညး, တံ့အံင်၊ နှာင်းဘော်က အံင်နံင်လိုပျိုတ်ဒဲး အပျဲတ်ကဲ၊ နံင်လိုပျိုတ်ဒဲးပူးဘော်ကဟိုဝ်။" စံင်ယေဆုစီဗီးဒါ်; တံ့အန်း "အာဝ်ဗါ်နဲးမ ပူးဘော်က၊ နံင်လိုပျိုတ်ဒဲး ပူးကိုဝ်းဘော်က ပူးဘော်ကနား။" ပံင်ဆိုင်ဒါ်;အန်းစံင်အခည်းမို; အဲတောန်းချေးလိုလည်ပျိုတ်ဒဲး ပံင်ကလူညး,အီး တော်န်းဘော်က။ ဗါည်းဒီး အန်းစံင်စီဗီးကလောင်းနဲဘို; အပိုမ်ကျေားကကည်း ဘာည်းညျဲန်း။



"ကိုင်းစံင်ဖြားဒီး အန်းတံင်နှေးတံင် ဘည်ဘာည်းစဲတ်တိုဝ်; တားကညးဒါင်း တံင် စရာင်းရိုန်း ပံင်ဆူညး,အန်းကဲ။ ပံင်ဆူညး,အန်းအူချေး တံင်နိုတံ့အန်း ရိုန်းကလော်ကအန်း အူဆဲန်။"



"ဘိုန်ဇဲန်: တားကညားဒါင်း စီတဲ,ပံင်ဆူည်,ဒီး ဆူည်,အန်းဈေတ်ဒဲးနီ အန်းဒီး။ ဂေါ,မိုးအန်းအာဝ်ဘယ်ဈေတ်ဒဲး၊ တားကညားဒါင်းစီဒါ် ; 'ယံင်းဗိုန်အန်း ကာည်းယံင်းဗိုန်ပီးအန်းကော်န်းအန်း စာနံင်ဈေတ်တာ် နီအန်း'။"




"ဘိုန်ဇဲန်: ချေးဒီးမာ် ဟည်ဒဲးအံက်တကဲပ်ကဲန်းဂျိုင်းအန်း တံလအာည်, တားကညားဒါင်းဒီး၊ စီမှန်းဒါ် ; 'ကစါည်းဒဲးဟံင်းအံင်းနား။ အံင်းနံင်ဗီးဈေတ်ဒဲးနီ နီအံင်းပါပည်မဲး။' ဘိုန်ဇဲန်: တားကညားဒါင်းဒီးမာ် ဟည်တိုင်းကစါည်းချေးဒီး အန်းစီဒါ် ; 'မည်းဘူလို့မဈေတ်ဒဲး နီမည်းကဲကဲဒီး'။"



"ဘိုဝ်လည်လေးဟောင်း ချေးပံင်ဆူည်ဒီးတတ် ဒတားကညားဒါင်းဒီး၊ အန်းစီဒေးကညား ချေးပံင်ဆူည်ချေးဟည်း အီးတံက်နီ တံာ်အန်းအူပယား။ စံန်အန်းယဲဝ်းချေးဒီးမာ် အန်းခဲန်မိပ်ပေါ၊ခမဲင်းချေးဒီး၊ စီမှာန်း'ဇျေတ်လာ် နီမည်း ပံင်လိုဒေးမည်းတံာ်အံဝ်း။"



"ချေးဒီးစီဒေးအံက်တကဲပ်ကဲန်းဂျိုင်းအန်း တံာ်လအာည်အန်း၊ စီမှာန်း ဒါ် 'ကဓါည်းဒေးအံဝ်းနား၊ အံဝ်းနံင်ဇျေတ်ဒေးဟ်း နီ ပံင်လိုအံဝ်းတံာ်လာ်ဒေး တံာ် မည်း။' ဘည်ဘာည်းမာ် အန်းအာဝ်စုန်းမ၊ ဂါချေးဒီး ညျမ်ဇျေတ်ဒေး နီဒီး အန်းဂီဟပ်အူန်းချေးဒီး ခဲင်းကဘေမ်း။"



"ဘိုဝ်ဒဲးယဲဝ်းတူအီးပံင်ဆူည်,အီးဟည်းကဲတ် အန်းဂီရဲန်း တံ့
 ချေးဒီး ဘာည်းဇဲန်း၊ ကဲဟည်ဗီးကလောင်းနဲဒို့ တံ့တားကညားဒါင်းကဲ။"



"ဘိုန်ဇဲန်း တားကညားဒါင်း စီဟည်ဆိုင်ဇာဝ်းပေါ,ခည်း၊ စီတဲ,ပံင်ဆူည်,
 ချေးဒီး စီဒါး 'မည်းမအဲးမိုက်ပေါ,ခည်း အံဝ်ဆိုင်ပျိုတ်ဒဲးအူန်း နီမည်း။ မည်း
 ဆံမ်အာဝ်ပျိုတ်ဒဲးဟံင်း တံ့ချေးဒီး။' ဂေါ,မိုးဘာည်းဇဲန်း တားကညားဒါင်းဒီး
 စီချင်းဗိုန်အန်း တိုင်ကတဲဝ်းကဘဲမ်း ဂါအန်းလျှမ်ဈေတ်ဟော်ည်,ဒို့ နီးအန်း။"




ဘိုဝ်ဟော်ညံ,ကလောင်းတံ ဘညံဘာညံးအပိုမ်ကျော့ကကညံးဒီး
အန်းစံဝ်စီဒါး "ချွေးမွဲ ဆာဘူဆမားပျိုတ်ဒဲး အပျဲတ်ပံင်ကလူညံ, ပီဗါးကဲ
အီးဂေါ်ညံးကတ်မ်ရိမ်းပဲ၊ အီးမိုးစံဝ်ဖြား အန်းအီးဂေါ်ညံးပျိုပျို န်းဇားမာ်
နံင်အာဝ်ပျိုတ်ဒဲးမ အပျဲတ်ပံင်ကလူညံ,ပဲ။"

၃၀။ စံဝ်ယေဆု ချိုင်းဒဲး တူအီးဖ်နိုးဟောင်း



မတဲ ၁၄:၁၃-၂၁၊ မာကု ၆:၃၁-၄၄၊ လုကာ ၉:၁၀-၁၇၊ ယောဟာန် ၆:၅-၁၅




စံဝ်ယေဆုစီပွေးဟောင်း တပဲအန်းကဲ စာနံင်ဟောကလောင်းပနံင်းဒဲး
 ကျေးတြား တံတူအီးကဲ။ ဘိုဝ်မီးမီးဒဲးကဲ၊ ကဲစီဒဲးကလောင်းဘည်ဘာည်း
 ဟောကလောင်းပနံင်းဒဲးကဲ တံတူစံဝ်ယေဆု။ ဓါည်းဒီး အန်းစံဝ် စီတေ့ဟောင်းကဲ
 ပါဒီယေန်ချီ၊ စာကဲနံင်အိုင် လှဲဝ်းလာ်ဒါး။ ဂေါ၊မိုးဘာည်းဖဲန်း ကဲစီလေပ်ဘံက်
 ကလေ့၊ စီလည်လေးဟောင်းပေါ၊ဟံ့။




ဘည်ဘာည်းမံ တူအီးဂိုန်းကဲစီဟည်ယေဝ်း စံဝ်ယေဆု ကာည်း
 တပဲအန်းကဲ ဟည်လည်လေးဟောင်း။ ကဲကဲဒီး စီတဘုဟောင်းတော၊ပါင်းအဲမ်း
 နှာင်းကဲဟောင်းစံမ်းလအည်၊ယေဆု ပါပါင်းအဲမ်းညျာဒါ။ ဘိုဝ်ဒဲးစံမ်းယေဆု
 ကာည်း တပဲအန်းကဲ ပါပါင်းအဲမ်းညျာဒါဒီး၊ ကဲစီယေဝ်းလာ် တူအီးဂိုန်းကဲ
 ဂီပည်နံက် ရံပ်အိုင်ရိုးအူန်းကဲ ပါဒီး။



ခဲင်းတူအီးဂိုန်းကဲကဲဒီး အာဝ်ဒီးတော့မ အီးပန်းကာည်းကော်န်းဒဲ၊ မိုးလို့ည် စရင်းအီးမာည်း ကံပ်ဂေါ်ည်းပေါ့ဖါန်းဟောင်း။ အန်းစံဝ်စီယဲဝ်းတူအီးဂိုန်းကဲကဲ ဒီးဘာည်းပေါ့ ပူးဘူမဲး ကညျားအီးတိုဝ်းမေန်း၊ အန်းစီမဲးနော့ကဗိုည်းကဲ စီပနံဝ်းဒဲးတံ့ကဲ စီဆားနာမ်းဒဲးဘိုး နှာင်းယော်ကာကဲကံပ်ဂဲန်းချို၊ ဒိုပါပည်မဲးဟံ့။




ဘိုဝ်စမ်းဒဲးတံ အချိုင်ဇိုအ်၊ တပဲအန်းကဲ စီဒဲးကလောင်း တံ့အန်းစံဝ် ဒါး "အိုဝ်စံဝ်ကညျား၊ ဘျည်းမာ် ဟည်အ်ဒဲး၊ အာဝ်မဲးမလှိုင်းဆီ ဂေါ်ည်း ကတ်မ်ပျိုက်ကဲနီး ဒဲးတူအီးကဲ ဟောင်းဇိုဝ်းပံင်ဟိုမ်း စာနံင်ဟိုမ်းကဲ။"



ဘည်ဘာည်းမာ် စံင်ယေဆုစီဗီးဒါ်;တၢ်တပဲအနးကဲ "ပဲစီဒဲး; ပံင်ဟိုမ်းပံင်
စိုင်း တၢ်တူအီးဂိုန်းကဲကဲနီး။" တပဲအနးကဲ စီဗီးဒါ်; "ယေးစီမဲးလို့ညှ ခမူန်း
အယ်ပိုင်း ကာည်း ကားအယ်တိုး၊ မှဲယေးနံင်ဘာည်းချိုင်းဒဲးကဲဟိုမ်း။"




စံင်ယေဆုစီတဲ,တူအီးဂိုန်းကဲကဲဒီး၊ ဆူညှ,ကဲအံက် တဲင်းဘဲတ်ညှိုင်း
ပေန်ခမူပေန်စုမ်း၊ ပေန်စုမ်း။



ဓါည်းဒီး စံဝ်ယေဆုစီတဲးဖ်း၊ ခမူန်းဖ်းပိုင်း ကာည်း ကားအယ်တိုးဒီး၊
 အန်းစီဆိုင်ငဲးတိုင်းဟိုက်ပျိုပျိုန်း ဇိုက်ပိုက်ခိုည်းတာင် ကေးစူးစံဝ်ဖြားဟာံ။



ဓါည်းဒီး စံဝ်ယေဆုစီဣွာ်လ် ခမူန်းကာည်းကားဒီး၊ စီဒဲးတပဲအန်းကဲ
 ကဆာင်းဒဲး တံတူအီးဂိုန်းကဲကဲဒီး။ ဘိုဝ်ကဆာင်းဒဲး ခမူန်းကာည်းကားဒီး
 အန်းအာဝ်ဆမားမကဇူတ်၊ ဒိုဟောင်း။ တူအီးကဲကဲဒီးပျိုပည်မဲးဖ် ဘိုန်းဟိုမ်းဖည်း
 ဒိုတော်န်းချေးတော်န်းချေးဟာံ။



ဓါည်းဟိုမ်းဖည်းဒိုတူအီးဂိုန်းကဲကဲဒီး၊ တပဲအန်းကဲ စီလှယ်လတ်တကျော်တ်
ခမူန်းအီးခလှိုင်းကဲဒီး၊ ဓီးတကျော်တ်ဘိုန်းဘိုး အူကိုင်းလေးအယ်ဂျီက်နိုက်နိုက်။
ပံင်ဟိုမ်းကဲကဲဒီးပါ ဒိုဒို စီမိုးလှိုည် အီးဒေးတိုင်ခမူန်းဖ်န်းပိုင်၊ ကာည်း ကား
အယ်တိုးဒီးဟာံ။